

Presentada

MARTINO CONTU
Presidenti de su Centro Studi SEA

Distanziau de un annu, essit in su sistema informaticu su sigundu numuru de «Ammentu», cun d'una novidadi. Intra is linguas chi sa rivista hat accolliu est assentada sa lingua sarda in is tres variedadis suas: su campidanesu, su galluresu e su logudoresu. De di ora, sa direzioni fiat in s'idea de avvalorai su sardu comenti una lingua de depiri impreai po iscriri articulus e librus scientificus, aici comenti de giai suzzedit po atras linguas de minoria de s'Unioni europea, cumenzendi de su catalanu, una lingua fueddada e iscritta de pagu mancu de 9 millionis de personas in Catalogna, Valenzia e isulas balearis, a parti sa Franza, in sa regioni de Rossiglioni e in s'isula nosta, in sa zittadi de s'Alighera. Beni cumprendiu, ndi seus sigurus ca a su risultau chi est istetiu cunsighiu in Ispannia in s'area linguistica de su catalanu, mancu a ci penzai a ddui podi lompi oindi in Sardigna. Ma a parti custa cunsiderazioni, creus chi siat unu doveri e po finzas unu prexeri po sa parti chi si dexit, de tenniri in contu avvalorendidda una lingua - sa lingua nosta, sa lingua de babbus nostus - cali mediu fundadori de s'identidadi nosta; s'identidadi de una patria pittica, autonoma (mancai de un'autonomia non cumpria), cumprendia però in d'una patria prus manna, chi est s'Italia.

Custu numuru, dedicau a sa diciosu memoria de su prof. Titu Orrù, tenit unu fasciculu e dus Focus. Su fasciculu: *1840-2010 Sardigna-Uruguay. De is 170 annus de amistadi e rapportus de cultura e de negozius a una possibilitadi de unu sviluppu economicu prus mannu*, appariciu de Giampaulu Atzei e Martini Contu, arregollit is autus de s'atobiu internazionali, chi portat su propriu nomini, chi s'est deppiu tenniri in Casteddu e Biddecirdu in is dìs 25 e 26 de santu gaini de su 2010, promoviu de su Centru Studi SEA e de su Consulau de s'Uruguay in Sardigna. Is articulus abbrazzant chistionis appizzus de cambiis de mercanzias e rapportus consularis intra sa Repubblica Orientali de s'Uruguay e su rennu de Sardigna a prima e su rennu d'Italia apustis. In prus un'attenzioni speciali est dedicata a s'emigrazioni de s'accabu de s'Ottuxentus de sardus studiaus e a su chi hant pozzu fai is emigraus de sigunda e terza genia, e cun precisioni trattendi de is nominis nodius de Juan Carlos Fa Robaina, medas bortas deputau e senadori, visuministru de sa cultura in su 1972, candu su ministriu fiat dirigiu de Julio Maria Sanguinetti, apustis presidenti de s'Uruguay; e Osvaidu Crispo Acosta "Lauxar", maistu litterau e criticu de Litteratura latinu-americana e ispanniola, chi fiat parti de su movimentu mellus connotu comenti sa "Generacion del 18" .

A sighiri su Focus *Consulus e Consulus strangius intra Settixentus e Ottuxentus in Sardigna e Corsica*, appariciu de Manuela Garau, dedicau siat a is consulus e a s'attividadi de is consulus francesus, maltesus e ottomanus in Sardigna, siat a su consulu de su rennu de Napoli Franciscu Bigani chi hat traballau in Corsica in is annus de cambiamentus de sa Rivoluzioni francesa.

S'urtimu Focus, *Visitas pastoralis in s'edadi moderna e de oindi*, appariciu de Cecilia Tasca, si podit pensai comenti un'acciunta a is istudius de una categoria de documentus, chi mancai abarrint stesiaus a parti, eppuru, donendisì su parrimentu, s'opinioni de is obispos - medas bortas assoziada a atras cartas, comenti is relazionis ad limina- diventat indispensabili po podiri connosci s'orgazzazioni ecclesiastica e giuridica de sa diocesi, e ancora s'attividadi de sa classi clericali e po finzas po

arriciri informazionis asuba de sa vida de is parroccias in paricius argumentus, moralis, socialis, economicus e culturalis.

Dus fueddus, a urtimu, appizus de su Prof. Titu Orrù, a su cali, comentu heus nau, est dedicau custu numuru de «Ammentu»: professori de Istoria economica e de Istoria de sa Sardigna in sa facultadi de Iscienzas Politicas de s'Universidadi de Casteddu, benniu a manca giustu de un annu, dd'arregordaus poita hat publicau impari cun su professori Carlinu Sole s'edizioni de su Diario politico 1855-1876 de su deputau republicanu Giorgi Asproni, e po essiri steti direttori e animadori continuu de sa rivista «Bollettino bibliografico e rassegna archivistica e di studi storici della Sardegna». Ma appizzus de tottu boleus arregordai sa sardidadi sua, de si deppi intendi comentu unu forti attaccamentu a sa Sardigna, stima po s'istoria de s'isula, po is tradizionis suas, sa cultura, sa lingua, su sardu, connottu de sa pitzinnia, chi, issu, comentu istoricu, hat circau de defenzai in tottu is formas litterarias suas, cun impinniu e sentidu zivili.